



Manuscripti instar, ad usum Nostrorum tantum

A. R. P. N. GENERALIS AD P. HENRICUM BARON DE CONGREGATIONIBUS MARIANIS

Occasione duorum congressuum directorum quos Nostri in Gallia a. 1926 et 1927 celebrarunt, A. R. P. Generalis inter alia haec scripsit ad P. Baron qui conventus ciebat:

I.

« Video conatus tuos imprimis dirigi erga **CC. virorum iuvenumque**. Reapse pro his institutae fuerant; diu ipsis solis apertae erant et, cum ex bonis rationibus inter feminas quoque propagatae sunt, nunquam cessabant ante omnia opus esse virorum et iuvenum.

« Si hodiernis temporibus minore gaudent gratia, nonne hoc aliquantulum nobis adscribendum est? Non raro sacerdotes saeculares et religiosi aliorum ordinum mirantur videntes hinc inde nostros PP. qui arma haec incomparabilia, quae nobis invident illi, e manibus elabi sinunt vel ad monumenta venerabilia historica relegant. Quod speciali modo inopportunum est nostra aetate ubi tanti fit virtus coetuum delectorum atque proclamatur necessitas hos coetus intime penetrandi, iisque utendi ad campum actionis magis magisque extendendum. Et dum alii, et boni, et pro dolor, etiam mali, pervetus istud principium tanquam novum iactant, illudque summo ardore applicant, nos CC. nostras dereliqueremus ut rem obsoletam!

« Nova opera circum nos unum post aliud exsurgunt cotidie; quorum alia decipiunt sua sterilitate, alia verum aut saltem apparens bonum sat magnum producant; sed non durant, et plerumque cum suis fundatoribus evanescent. Nullum ex eis efficacitate et stabilitate nostrarum CC. pollet.

« Iamvero in hoc praecipue consistit **propria indoles Congregationis** quod *nullo altero instituto superatur in procuranda suarum asseclarum sanctificatione et apostolica formatione*, quodque ipsum apostolatus exercitium ex superabundante vita interiore promanat. Novum diceres coenaculum ubi congregantur in oratione coniuncti cum Maria Matre Iesu per Spiritum Sanctum transformantur in Apostolos.

« Unde ergo venit **deterior C. conditio** quam deploramus? Certo certius non ex principio interno hodie minus opportuno, quod non est aliud quam ipsa "*anima omnis apostolatus*... Neque ex organizatione externa nostris temporibus minus accommodata, nam mira gaudet sub hoc respectu facilitate et idoneitate. Nonne causa huius detrimendi potius **apud nosmetipsos** quaerenda est?

« Sunt qui putant altam perfectionem in CC. propositam deprimendam et minuendam esse ut maiores numeros attrahant. Sed frustra; nam **generosa iuventus ad sublimiora aspirat**, a mediocritate abhorret, et potius ad alia instituta se convertit ut ibi reperiat quod Nostri dare non audent.

« Est etiam **pruritus quidam fulgoris externi et rerum novarum** qui ad hoc tendit ut indoles CC. immutetur atque debilitetur, utque opera praeferantur magis fucosa et strepitosa, et generatim magis agitata quam activa. Obscure et perseveranter se devovere utique minus gratum est, sed quanto maioris fecunditatis.

« Denique ipsa animi **promptitudo ad res initiandas** quam non pauci habent, **nimum gignit individualismum** in operibus, praesertim apostolicis, gerendis. Quisque vult suam habere operam

cui proprium imprimat characterem, et aegre fert indirecta et secundaria tantum ratione conferre ad opus universale Societatis et Ecclesiae. » (20 Iul. 1926).

II.

« Ut CC. prospere procedant suosque fructus ferant, **omnes Nostri** eas sibi cordi habeant oportet, eisque fovendis **efficaciter cooperentur**. Nam Societas CC. inter opera maxime sibi propria adnumerat, easque peculiari affectu amplectitur. » (14 Sept., 1926).

III.

« *Et toto animo orationes fundo ut Nostri magis ac magis verum spiritum et vim incomparabilem CC. intelligant*; dubitari nequit de magno favore et effectu quem hodie in Gallia habent si omnis Societatis filius eis eundem zelum, idem obsequium et praesertim eandem animi sui persuasionem devoveret quam **alii ordines religiosi** foveant erga opera institutis suis propria: *tertios ordines, rosarium, confraternitates* etiam tenuissimas; qua in re nobis exemplum praebent valde laudabile.

« Secretarii uniuscuiusque provinciae et nuntius « *Les Cahiers Notre Dame* » cordi habeant prae primis ut magis cognoscantur et amentur CC. de quibus vel apud Nostros saepe conceptus valde incompletus et vagus habetur....

« Quod ad **Secretarios** attinet, desideriiis meis respondent quoties **me certiore facient de suis laboribus, necnon de fructibus** quos in suis provinciis tum apud Nostros tum apud externos colligunt. » (1 Iul. 1927).

QUIDNAM C. ALUMNORUM AGERE POSSIT?

Quaestio haec multum agitur neque ubique bonum responsum accipit. Audiamus quid ad rem director expertus in « *The Queen's Work*, » 1927, p. 269, exponit.

Imprimis excludit omnia opera quibus vana gloria et ostentatio facile nutriuntur. Iuvenes nequaquam onerantur panariis, corbulis dulcedinum, condimentorum..., neque terni quaternive ut assecrae sacerdotis adportantis vestimenta trita ad pauperum tuguria accedunt. Haec omnia in abstracto ut egregia exercitia humilitatis, abnegationis apparere possunt; sed maiori iuvenum numero repugnant, neque absque causa: nam ostentatio virtutis adolescenti intolerabilis est. Et pauci qui forte huic operi se dant semel, satis se fecisse pro multo tempore putabunt.

Optimum opus charitatis sodalium alumnorum aliorumque iuvenum erit visitare captivos, senes... in asylis reipublicae. Orphanotrophia et nosocomia catholica quo-

rum curam agunt moniales multo minus sodalium adiumentis indigent; a sororibus misericordiae satis ipsis provisum est. Ex altera parte vero neminem fugit quantopere habitatores istarum domorum civitatis vel status indigeant isto studio atque amore quem iuvenes visitantes facile ostendere queunt.

Quid ergo praestare possunt sodales his hominibus? Ante omnia **copiam legendi**! Folia cotidiana, hebdomadaria..., illustrata, facile inter omnes alumnos collegii a sodalibus colligi possunt. Neque oportet ultimas tantum editiones colligere; omnia, dummodo nihil contra fidem et bonos mores contineant, distribui possunt. Bibliopolae quoque fortasse cedent quae divendi nequeunt.

Alterum quod multum valet in visitandis senibus et pauperibus est **conversatio affabilis**. Non pauci horum senum vel pauperum neminem suorum habent cui narrent quae ipsis cordi sunt, vel cui cordi sit cum ipsis agere eorumque curam gerere. Hi solitarii vel in oblivione iacentes, tanquam diem festivum et solemnem per totam hebdomadam expectant et desiderant diem dominicum quem tam doctus adolescens cum ipsis peramanter satis magnam partem peragit! Sed quid tunc, si sodalis hinc inde aliquid **tabaci** avo, aliquid **dulcis** affert aviae! Necessaria haec non sunt, sed conversationem reddunt faciliorem.

Visitare, ubi permittitur, **in custodiam traditos**, opus multo difficilius est. Duo monita stricte observanda sunt: *nulla ratione causam damnationis vel ullas quaestiones legis cum detentis tractent*; secundo *nullum nuntium quemcumque, vel minime suspiciosum alicui transmittendi suscipiant*. Optimum erit pauca verba benigna facere et typis impressa tradere.

In aedibus his publicis, quibus, ut patet, nosocomia quoque illa adnumeranda sunt quorum *ministri vel ministras sunt laici*, sodales dicto modo veri apostoli, praecursores sacerdotis, diaconi laici esse possunt viam sternendo sacerdoti cui saepe non licet ullum incolam adire nisi ab hoc ipso vocatus sit.

Ipsis quoque sodalibus hoc eximium charitatis exercitium in **magnum virtutis profectum** vergit, nam nemo illi se dat per longum tempus quin illud amet. Quod plurius est: sodales evadunt meliores christiani, meliores sodales nobilioris animi qui parva ducunt sacrificia quibus opus est ad exercendam charitatem.

Quae hic proponuntur nova non sunt, sed ab antiquo in usu erant in CC. marianis et nostris quoque temporibus non oblita, at, rarissime executioni data a sodalibus **alumnis et iuvenibus**, praesertim quando diebus dominicis ab ipsis petitur; nam hi dies in multis regionibus, prohi dolor! sodalibus quoque satis sanctificati esse videntur, si quis missam audierit; totum diem reliquum ludis et excursionibus impendere multo magis faciunt quam opera charitatis.

Valde adprobatur a plurimis directoribus sectio quae parochus adiuvatur, cui nomen, « *sectio adiutrix curae animarum paroecialis* ». Licet tota C. parochus vel rector ecclesiae in officio suo adsistat, tamen talis sectio vel turma specialis congregandarum magni iuvaminis et utilitatis pro parochus et paroecianis esse potest.

DUBIA QUAEDAM RESOLVUNTUR

P. I. H. interrogat :

1) PP. residentiae nostrae (in missione aliqua) etiam paroeciae curam agunt; a P. Prov., ut patet, mittuntur; Epp. eos adprobat; etiam directores CC. mar. Haec adprobatio directoris per Epp. estne absolute necessaria ita, ut ea deficiente receptio in CC. esset invalida?

2) C. erecta est ad eccl. paroec. Iam per 50 annos, sodales ex 4 vicis " dependentibus „ ad conventus C. venerunt huc. Possuntne in posterum conventus ordinarii celebrari in istis 4 sacellis, data occasione visitationis quae unoquoque mense ibi fit? Inde iam non amplius ad sedem C. unquam accederent.

R. ad 1) *Negative*. Ad validitatem receptionis sufficit nominatio praesidis per P. Prov., quia C. a P. Generali erecta est.

Quare etiam v. g. mox mutato direttore, opus ad validitatem istam non est, prius petere adprobationem novi praesidis ab Epp.

R. ad 2) Nihil obstat quominus *hinc inde* una vel altera concio, immo receptio in C. habeatur in illis 4 ecclesiis dependentibus; sed illuc *semper omnes* actus religiosos C. transferre, non licet, quia C. erecta est ad eccl. paroecialem, quare haec sanctuarium principale conventuum est et manere debet pro sodalibus *omnino omnibus*, licet in alio vico habitent.

OPERA ZELI SODALIIUM

Caesaraugustae (Saragossa), Hispania. C. Universitatum Virginum quamquam non valde numerosa, plena spiritu apostolico est. Quod probatur *academiis* solemnioribus et privatis, *conferentiis*, praesertim vero *opere catechistarum* cui magno cum fervore se dant ex a. 1925, quo C. fundata est. Studiis impense navantes per hebdomadam, die dominica horas impendunt instruendo circiter 100 parvulos illisque etiam subvenientes in rebus temporalibus. (" *Estrella del Mar*", Madrid, 1927, n. 207, p. 354).

Ibidem etiam *juvenes C. S. Aloisii* omni die dominica p. m. in idem opus apostolatus incumbunt apud centenos pueros et adolescentes suburbiorum. *Tria centra catechistica* constituta sunt quorum unum e. g. cum circiter 80 pueris qui iam acceperunt primam communionem; alterum cum 150 pueris; ad unam sectionem accurrunt opifices adolescentes saltem 15 annorum. Inter auditores 20 catechistarum, aliqui sunt qui primos 5 vel 6 huius operis *fundatores lapidibus salutaverant*! Finita catechesi, *facultas ludendi* praebeatur qua multi alliciuntur aequae ac *praemiis*, quorum sollemnis distributio quotannis fit. Sodales in dies magis inflammati pro regno Christi, *apostolatam suum iam a pueris ad horum parentes* quoque extendunt. (" *Estrella del Mar*", Madrid, 1927, p. 245).

Barcinonae. C. juvenum a. 1926-27 in suburbium officium 38 sodales ut catechistas misit, omni die dominico et festivo. A mense oct. usque ad m. iunium *adsiscebant 20.861 parvuli explicationibus doctrinae christianae*, 7.232 missae sacrificio; 3.015 ad s. mensam accedebant.

Chile. Cons. sup. foed. nation. CC. m. etiam hoc anno magno cum fervore promovebat *diem eucharisticum nationalem*; a. 1926 in 43 urbes principales delegatos miserat. Praeses laicus huius consilii nomine

totius civitatis et terrae valedixit Nuntio Apostolico (RR. DD. Aloisio Masella) discedenti. Instituit hoc consilium in sedibus episcopalibus conventus sodalium dioecesanos, ut:

1) CC. episcopo suo obsequium debitum praestent eiusque vota audiant;

2) studeant unanimes quo modo episcopus adjuvari possit in operibus suis, praesertim in sustentando cultu et instructione religiosa;

3) unaquaeque C. rationem reddat de vita et apostolatu suo, et adducatur ad maiorem profectum praesertim eo ut conventus celebret *hebdomadarios*;

4) investigetur quo modo fieri possit, ut in omni paroecia dioecesis erigatur C. saltem virorum, et forsitan etiam mulierum, parvulorum operariorum;

5) instituatur consilium CC. m. dioecesanum ad promovenda omnia quae spectant ad sodalitates marianas et cultum B. M. Virginis. (Cf. " *Efemerides Marianas*", Santiago de Chile, 1927, p. 190 ss.).

Chile. Hoc anno etiam *foedus omnium CC. feminarum* per rempublicam plenos labores assumpsit ut inter mulieres CC. m. propagarentur, sicuti iam per aliquot annos foedus CC. virorum operatur. Delegatae 16 a suis episcopis nominatae saepe inter se conveniunt.

Annum conventum solemnem omnes CC. celebrant in urbe *Chillan*, diebus 30 et 31 m. octobris; de quo mox uberiores rationem reddemus.

Cincinnati, Ohio, S. F. A. CC. Virginum et matronarum ad dies recollectionis suae vespertinae omnes alias quoque feminas urbis invitabant magno cum successu; plus quam 800 accurrerunt. (" *The Queen's Work*", 1927, p. 269).

Idem non minori cum successu fecit C. virginum *Hötting, Austria*. (" *Fahne Mariens*", Wien, 1927, p. 182).

S. Ludovici, Missouri, S. F. A. C. academiae S. Ioseph centrum omnis activitatis religiosae huius collegii evasit. *Concilium spirituale* constitutum est a delegatis sodalium, Foederis SS. Cordis, puellarum Ss. Ss., unionis pro missionibus. Unaquaeque harum associationum omni mense conventum suum celebrat; concilium spirituale socios insuper eodem tempore convocat, ut agant de litteris catholicis, missionibus...

Pittsburgh, Pa., S. F. A. Director CC. dioecesanus mense iulio omnibus sodalibus virginibus opportunam *instructionem de praeparatione ad matrimonium* misit.

San Sebastian, Hispania. Mille " *modistae* " sodales, piam peregrinationem ad B. V. Patronam Pampelunae instituerunt quibus ipse Epp. loci missam solemnem celebravit. In adventu et reditu, iubente consule publico, tibiaram fidiumque honoratae sunt cantu.

Linz, Austria. C. virginum ad l. eccl. paroch. praeclearo modo unionem inter sodales parentesque promovit: loco ludorum scenicorum praeparavit " *diem matrum* ". Proposuit matribus aliisque invitatis 7 " *imagines viventes* " adumbratas pulchris carminibus. Imagines erant: mater ad cunas sedens; inter prolem quiescens; laborans; benedicens filiae valedicenti; orans; sepulchrum matris. Maria, mater caelestis. (" *Mariengarten*", Wien, 1927, p. 23).

Brixinae, Italia. C. alumnorum theologorum 65 sodales numerat. In conventibus extra sacellum, praeses de historia CC. et de modo condendae C. sermonem faciebat. *Sectio liturgica* de sacrificio missae tractabat, in specie de sacrificio missae proprie dicto; de modo quo hoc sacrificium offertur; de historica evolutione caeremoniarum; de explicando sacrificio missae e suggestu. (V. " *Fahne Mariens* ", Wien, 1927, p. 182).

DE CC. FEMINARUM

Aliquis Pater scribit:

Multi ex Nostris CC. mulierum parum favent. Pro-vocant imprimis ad vetitum quo feminae usque ad a. 1751 arcebantur.

At puto non recte. Nam si CC. feminarum a PP. Generalibus et S. Sede permissae sunt, id certe non absque bonis rationibus factum est quibus nobis contradicere et opponere non licet.

Porro, nemo non videt quantopere hae CC. egerint et agant. Multo plura sacrificia temporis, pecuniae, propriae abnegationis maiore animo quam viri praestant.

Adde quod diebus nostris magnopere mutata est relatio mulieris ad societatem publicam et omne genus laboris, actionis, scientiae, artis. Mulier, v. g. in officinis et fabricis hodie non minus periculis moralibus et religiosis exponitur ac vir. Votum suum et opera fert simul cum viro in multis rebus maximi momenti. Quapropter aequae firmata sit oportet in principiis et pietate, apta ad apostolatam cuius campus ipsi non minus patet quam viro; imo, iam multa opera apostolica a femina tantum executioni mandari possunt.

Tandem: quales matres, tales populi!

R. Apologia CC. feminarum profecto non inepta!

At 1) *non omnia opera bona a nobis* iesuitis fieri possunt nec debent;

2) quaero: cur tot ex Nostris defundunt has CC. mulierum illisque vires impendere volunt? Cur non prius id praestant erga CC. **virorum**, in specie **opificum** et **iuventutis**? Revera ex desiderio *maioris* gloriae Dei et *maioris* animarum salutis, ex *maiore* abnegatione?

DE ACTIBUS CONSECRATIONIS

Statuta C. ex a. 1910 sub titulo quinto, no. 27, duas formulas consecrationis praebent, quarum una "*S. Ioannis Berchmans*", altera "*S. Francisci Salesii*", inscribitur. Quo iure, quo titulo nomina horum sanctorum his actibus praefiguntur?

Responsum obvium forte esset dicere: quia probabiliter hi duo sancti istas formulas a CC. suis acceperunt et libenter repetebant, vel etiam in scriptis suis relinquebant.

En quae **P. A. de Becdelièvre** (prov. Franc.) diligenti facta inquisitione in "*Les Cahiers Notre Dame*", 1927, p. 190 ss., resolvit.

Actus S. I. Berchmans iam in "*Libello Sodalitatis*", P. Fr. Coster, prima vice a. 1576, dein 1583 Coloniae edito, habetur, unde satis certo inferre licet, hunc actum adhibitum fuisse in CC. prov. belgicae, ergo etiam in C. collegii Mechlinensis cui S. I. Berchmans nomen dabat.

Altera formula in usu erat in C. dominorum domus professae Parisiensis et valde probabiliter in aliis CC. Parisiensibus, ad quas etiam C. collegii Claramontani

(Clermont) numeranda est, cuius sodalis S. Fr. Salesius erat.

Insuper S. Fr. Salesius a Pr. Primaria ut sodalis proprius vindicatur (quo iure non omnibus constat); ab ipsa vero formula recitabatur quae S. Doctoris nomine honoratur.

CC. PRAEGRANDES

En quae scribit P. S. R.:

Nuntius noster pro CC. m. ante aliquot hebdomadas (1927, no. 2, p. 19) de numero CC. inter alia asserit, a. 1903 in 14 dioecesisibus Germaniae, (plures, v. g. totam Bavariam, omittit) exstitisse 1,413 CC. m. Unicuique harum CC. dena millia sociorum attribui vult, dicens, C. Ratisbonensem unam ex minimis esse eamque tamen 8,000 sodales, aliam de Altötting 14,000 socios suos dicere; et ita "*habemus numerum fabulosum sodalium*."

Interrogare liceat quid censendum de allatis numeris; quid de CC. tot sociorum in genere; quomodo director tot congreganistas bene noverit et ducat; ubi aliqui ex Nostris huiusmodi CC. praesint.

R. Quoad numerum CC. id dicendum est, eum multo inferiore esse numero actuali.

Unicuique sodalitati attribuire circa 10,000 sodales, exaggeratio ingens est. Quo ex fonte Nuntius vester hauserit?

De C. Ratisbonensi reapse asserunt non solum 8,000 seu plus quam 9,000 socios; de illa Altötting circiter 25,000 sodales.

Quo modo director tales exercitus bene educare et dirigere, singulosque sodales mediocriter saltem nosse potuerit, me revera fugit. Sedulus praeses indefesso labore sine dubio etiam tantam C. ad bonam vitam christianam et aliqua opera apostolica impellere potest, praesertim si ab aliis sacerdotibus idoneis adiuvatur; nihilominus mihi difficilis videtur educatio tantae molis ad ea quae leges C. m. postulant.

Proh dolor! dici debet, aliquas ex istis CC. tantum nomine tenus CC. m. esse. Scio aliquam cuius socius quicumque fieri potest: in sacristia ecclesiae in librum sodalium omnis pro lubitu nomen inscribere et ita "*sodalis fieri*" potest!

Maximam C. ex Nostris, saltem in Germania, P. R. Mayr magno cum fructu dirigit, adiutus a **P. Haas** et aliis religiosis; de qua C. vide quae dicuntur in articulo infraposto huius numeri *A. O.* cui titulus "*CC. virorum festa iubilaeae*," p. 76.

CC. m. seminarii maioris et minoris Villa Devoto (Buenos Aires). Episcopatum reipublicae suae rogaverunt, ut a S. Rituum Congregatione pro tota Ecclesia missam votivam ad petendas vocationes peteretur, cui voto unanimi plausu Episcopi responderunt, statim etiam ingredientes discussionem schematis huius missae, quod a sodalibus propositum fuit.

Iuvabit sine dubio multum, si CC. m. in aliis quoque terris idem ab Episcopis suis petant et hoc quoque modo conferant ad augendum numerum operariorum in vinea Domini.

CC. Virorum Festa Iubilaea celebrantes

I.

Monachii in Bavaria prima C. m. erecta est a. 1577, pro alumnis. Mox additae sunt CC. pro nobilibus et doctis; a. 1610 C. civium; 1644 C. iuvenum; pleraeque usque ad hodiernum diem florent et grato animo 350 a condita prima C. Monacensi annos simul celebrare seque ad novum fervorem in servitio B. V. M. inflammare cupiebant.

Die 12 iunii *Epp. Auxil. Monac.* 1.200 sodalibus missam dixit et s. synaxin distribuit. Postea a directoribus et magistratibus seriae deliberationes habitae sunt quibus *Em. Cardinalis Faulhaber* quoque adstibat, verba faciens. Oratores agebant: de fundamentis C. (*P. Finster*, prov. Austr.); sodalis in C.: quidnam in ea quaerit, invenit, quidque ipse praestat mundo (congreganista *laicus* Coloniensis); C. et iuvenes (*sacerdos saecularis*).

P. m., audito fervido sermone *P. Mayer* (prov. Germ. sup.), 4.000 virorum sodalium solemnem conventui in ecclesia intererant; vespere conventui amicali extra templum (1).

Altero die praesides tum a. tum p. m., consilia inierunt de via ac methodo bene **dirigendi et propagandi** sodalitates marianas earumque ephemeridem, et de utilitate et emolumento hauriendo ex CC. m. **in moderna cura animarum**. Finem fecerunt in sacello sodalium.

Status CC. in archidioecesi Monacensi-Frisingensi hic est. C. sacerdotum, a. 1911 condita, 1.081 socios in 28 coetibus numerat; 6 CC. puerorum 853 sodales, 23 CC. iuvenum 660, 18 CC. convictuum 2.095, 6 CC. studiosorum 676 socii adscripti sunt. 7 CC. pro certo statu vitae 1.243; 18 CC. virorum et iuvenum 10.988; 220 CC. virginum 15.220; 6 CC. matronarum 2.965 sodales nomen dederunt.

II.

Vitam trium saeculorum iure merito C. virorum et iuvenum urbis **Coesfeld in Guestfalia** quoque peculiari modo celebrabat diebus 26 et 27 iunii. Per hebdomadam praecedentem sermonibus cotidianis bene praeparati, maximo numero ipso festo die sodales ad s. mensam accesserunt; postea alteri missae adstiterunt. Ad conventum postmeridianum tum in ecclesia tum in aula celebratum, plus quam 100 CC. virorum iuvenumque cum vexillis convenerant.

Altero die praesides et consultores serio ac diu discutiebant profectum CC. De hoc iubileo ex Nostris prov. Germ. inf. optime meriti sunt *PP. Christ, Horstmann, Kettenmeyer, Schmitt*.

(1) C. virorum 5.000 socios numerat; praeses P. Rupert Mayer, S. I., est adiutus a P. Raim. Haas. Dividitur tota C. in 33 sectiones vel turmas paroeciales quibus providetur ab aliis religiosiis (benedict., capucc., francisc.), ubi ipsi paroeciae curam agunt; in reliquis 27 paroeciis isti duo PP. unoquoque mense ad sodales sermonem faciunt. Communio generalis turmatim in propria ecclesia paroeciali accipitur; concio *omnibus* sodalibus communis semel per mensem in templo nostro S. Michaelis habetur; sodales frequentes ad eam accurrunt aequae ac ad conventum proprium paroecialem.

Hi viri sodales duces sunt unionum et associationum catholicorum operariorum, charitatis, ac politicarum rerum.

CUR FIAS SACERDOS?

Auctore P. R. Plus (Prov. Camp.).

Nota Editoris. Scimus multos praesides CC. iuvenum magnopere desiderare dispositiones allocutionum ad excitandas promovendasque vocationes. Praebemus eis hodie amplam materiam quam quisque pro circumstantiis facile adaptare poterit iuxta haec quae P. Plus tam clare, tam disserte proposuit iuventuti in Gallia; cuique maximas dicimus gratias pro benevolentia qua directoribus CC. opera sua, mediante "*Actie Ordinata*", offert.

Ad quaestionem ergo

Cur fias Sacerdos?

respondetur:

Quia munus est pulcherrimum,
durissimum,
pernecessarium,
uberrimum.

I. Munus pulcherrimum.

D. Olier dicebat: "Deus duo miracula fecit: Sanctissimam Virginem et sacerdotem."

Sacerdotis autem dignitas ex duplici potestate in corpus Christi venit:

1. In eius corpus naturale (physicum):**a) Potestas consecratoris.**

Ut paululum potestatem illam singularem intelligamus: "Memoriam mirabilium suorum", — "miraculum insolens, nec alias factum nec usquam faciendum, ne in coelis quidem", (*Lessius*), seriem "prodigiorum", ad transsubstantiationem efficiendam considerare oportet:

- Extinctionem perfectam substantiae panis et vini.
- Species in existentia permanentes sine substantiis.
- Corpus humanum sine ullo "accidentium connaturalium", existens.
- Multis locis praesentiam.
- Suspensionem legis "localizationis", (vel localitatis) i. e. D. N. in unaquaque hostiae parte.
- Sine dolore immolationem corporis gloriosi.
- Christi corporis disparitionem simul ac fit corruptio.
- Sub immolatione multiplici unitatem sacrificii.

b) Potestas distributoris.

Splendidum sacerdotis officium Eucharistiam etiam vitae periculo distribuentis.

2. In Corpus mysticum (i. e. in anima):

Sacerdos enim Iesu Christo in opere eius succedere debet: nam si loquitur, "Iesus Christus per ipsum exhortatur" (II Cor.); si autem absolvit, I. C. in ore eius verba ponit veniae. Si gratiae prodigia operatur, Christus "in eo omnipotens", convertit et transfigurat.

Etenim per totum sacerdotium, per omnia ministeria, semper est sacerdos "legatus", "minister", vicarius, interpres Iesu Christi. Cum iam unusquisque christianus "alter Christus", esse debeat, quanto magis sacerdos cuius munera sunt:

1) *Iesum ostendere*, quod fit per ministerium praedicandi. Cum enim omnibus dicat: "Regnum Dei appropinquat", praedicat:

a) Regnum Dei, "ea quae Patris";

β) eius propinquitatem, Emmanuel: Nobiscum Deus.

2) *Iesum in animis gignere*, i. e. per baptismum in Christum inserere palmitem qui in posterum vitam divinam vivet; per poenitentiam autem iterum animas peccato separatas cum unico trunco iungere.

3) Curare ut *Iesus in animis crescat*, distribuendis sacramentis vivorum, hortando ad virtutem, etc.

Ecce sacerdotis effigies quae eius ministerii maiestatem demonstret:

"In unaquaque paroecia homo est qui nullam quidem habet propriam familiam, ad omnes vero familias per-

tinet; qui hominem e sinu matris suscipit neque unquam deserit nisi sepultum; qui cunas, lectum funebrem, capulum benedicit et consecrat; quem pueri amare et venerari solent, cuius ad pedes provoluti christiani de rebus suis occultissimis confessiones et lacrimas effundunt; qui, ex officio, omnium animi corporisque molestiarum consolator est; cuius ad ianuam et dives et pauper vicissim pulsatur; prior ut secretam conferat eleemosynam, alter ut eandem non erubescens accipiat; is denique homo cui omnia dicere liceat cuiusque verba cum summa divini legationis auctoritate in mentes animosque incidunt!

Ille homo presbyter est! (*Lamartine*).

"Si scirent homines, si intelligerent quid sit sacerdotium, nimis multi essent sacerdotes. Deus, ut opinor, sacerdotii catholici splendorem et pulchritudinem quasi velo tegit et obscurat, ne nimis multi temere hoc lumine urantur et consummantur.

Dei enim adiutor est sacerdos, Christi apostolus, id est: illius Cordis mundi arteria, unus ex radiis gloriae illius ardentis, fulgentis, amantis, quae quidem est Dei sol ad terram expurgandam et uberem faciendam."

(*Gratry*: "Philosophie du Credo," p. 242).

Methodus Vitae Christiano-Marianae

ex legibus Sodalium formata
et usui quotidiano accommodata
pro omni aetate, conditione et statu. (1)

IV.

Exerce devotiones liberas breviter, suaviter.

Breviter, nam si longae aut multae sunt, uti illorum, qui pluribus Confraternitatibus dederunt nomen, vel misere exequeris, vel cito omittes. Non interest, quantum facias, sed *ex quanto affectu*: unus aureus multis denariis aequivalet. Exiguus etiam devotionibus pretium fervor facit, et *constantia*, sicut adamanti fulgor, atque durities.

Suaviter, id est, libere, et sine tristi necessitate, ita ut scrupulum non moveas tibi, si vel mutes cum suadetur devotio melior, vel si omiseris, cum iusta est causa. Nemo sit sui mancipium: sicut prudentis est, non temere mutare consilia, ita cum tempora mutantur et circumstantiae, mutari nolle, non est hominis, sed statuae. Examinari omnis novitas debet, damnari non debet.

V.

Utere precibus iaculatoriis saepe, sincere.

Saepe, et saltem semel omni hora, ora. Quod respiratio est corpori, hoc oratio animae: refrigerat.

Symbolum Apostolorum, exhibet pharetram, unde depromas spicula, quae nubes, et ipsum cor Dei penetrent.

Quando mensam accedis, primus articulus monet, ut dicas: "Credo in Deum Patrem: a te Pater, omne bonum est mihi! ah! ut nunquam abutar male, benedic Pater, me, et haec tua dona, quae de tua largitate sumpturus sum."...

Cum occurris amico, ex secundo articulo excita te,

et illum ad Christi laudem; dic corde et ore: "Laudetur Iesus Christus, quia Filius Dei unicus est, nec habet parem: Quia Dominus noster est, Dominus quo melior non potest optari!..."

Articulus tertius usui erit ad *Salutationem Anglican* ter repetendam in die, eo fine, ut recolatur memoria Incarnationis Dominicae effectae a Spiritu S. in Maria Virgine, cui proinde gratulamur, quod facta sit Filia Dei Patris, Mater Dei Filii, sponsa Spiritus S. rogamusque *vesperi*, ut peccatoribus Luna sit, ne a fide deficiant; *mane* ut paenitentibus aurora sit, a qua spes foveatur; *sub meridiem*, ut perfectis Sol sit, qui charitatem accendat...

Articulus quartus pertinet ad *tempus adversitatis*, ac aerumnarum, cum animus ad impatientiam, et murmura concitatur: Tunc, oculis in Iesum passum sub Pontio Pilato coniectis, cogitabis: "Quis Iesus, et ego? quid Iesus, et ego? Cur Iesus, et ego patimur?" Infinita disparitas pudorem, pudor patientiam pariet.

Articuli quinti memoria *tristanti solatium feret*. Dices: "Credo, quod Redemptor meus descenderit ad inferos sed et tertia die resurrexit a mortuis: nullum in terris malum aeternum erit..."

Cum caelum aspicias: cogita "Eia, huc ascendit Dominus meus (quod sextus articulus docet); hic sedet ad dextram Patris! o ut merear aliquando tam beato aspectu frui!..."

In rebus dubiis consilium ex articulo septimo petes, et ex te quaeres: "Cum venturus est Dominus iudicare, utrum ex duobus decrevisse desiderabo?" Crede mihi, ex hac regula nihil statues insipienter...

"Credo in Spiritum Sanctum!" ita articulo octavo profiteamur, et proderit actus *tempore tentationis internae*, cum sive cupiditas, sive timor ad peccatum allecat!...

Articulus nonus firmat animum contra *tentationes externas*, quae a verbis aut exemplis infestat: "Credo Sanctam Ecclesiam, et Sanctorum communionem! nolo immiscere me reprobis!..."

In angustiis conscientiae articulus decimus solabitur: "Credo remissionem peccatorum!..."

In doloribus corporis undecimus sustentabit: "Credo carnis resurrectionem!..."

In prosperitate fortunae, duodecimus ab amore vanitatum abstrahet: "Credo vitam aeternam!...", caetera nihil prosunt...

Ita Symbolum tibi pro penore, pro armamentario, pro pharmacopolio erit.

Sincere, puta de corde, non ex ore. Si bene orare vis, ama, et ama per omnes modos: dic per *indicativum*: Amo te Deus mi ex toto corde, Ah! quam sero!... dic per *imperativum*: Ama anima mea, ama amabilem Deum, etiam cum ferit, ama!... dic per *optativum*: Utinam amavissem te semper, Deus mi! pereat hora, qua non amavi!... dic per *coniunctivum*: Da, ut amem te amplius, o Deus amoris, ut amem amplius!... dic per *infinitivum*: Cupio sine fine amare, sine fine, sine fine!... Certe nemo citius declinat a malo, quam qui sic *actiones suas coniungere* didicit *cum amore*. Amor est igni similis: ut ab urticis et sentibus per sarculos purgetur ager, quanto tempore, et labore est opus! ignem adhibe: hora sufficit.

(1) V. E. Neumayr, S. J., "Idea cultus mariani sodalitatibus proprii," ed. 2, Monast. S. Galli, 1754.

**Conspectus vocationum
inter auditores rhetoricae colleg. prov. Belgicae.**

Ann. schol.	Auditores	Semin. theol.	S. I.	alios ord.	in toto	010 (inter rhetor.)
1921-22	419	32	38	13	83	19,8
1922-23	388	26	41	13	80	20,6
1923-24	416	29	35	20	84	20,2
1924-25	415	26	39	22	87	21
1925-26	404	26	32	22	80	19,8
	2042	139	185	90	414	20,3

SODALES MARTYRES MEXICANI

Patres satis multi ex pluribus terris nonnulla interrogant circa illos sodales martyres de quibus in "A. O." huius anni iam pluries sermo erat. Imprimis scire cupiunt quo anno, loco, direttore, aetate in C. m. admissi fuerint quibusque relationibus cum nostra Societate coniuncti.

Respondemus prout possumus, aliqua breviter repetentes, alia nova adducentes.

Emmanuel Melgarejo, a. 1920 a P. Iacobo Ramirez, S. I., decennis, in C. m. receptus fuerat (Cfr. "A. O." p. 7) Utrum alumnus alicuius collegii nostri fuerit, nescimus.

Ioachimus Silva discipulus Nostrorum fuerat in collegio *Mascaronensi* (v. "A. O." p. 42) et sodalis [ib.]; quando et a quo in C. receptus?

De **martyribus Legionensibus** scripsimus ("A. O." 43-44) **Nicolaum Navarro** sodalem 20 a. natum et maritum, **Joseph Valencia Gallardo** 17 a. natum et praefectum C. m., **Salvatorem Vargas** 20 a. natum secretarium C. m., et **Ezechielem Gomez** 17 a. natum sodalem fuisse.

Quinam ex eis apud Nostros instructi et educati fuerint, nos fugit. At, ex epistula *P. Phil. Arès* (prov. Mex.) haec afferre liceat de his martyribus *Legionensibus*,

"Discrucior animo discens quod congreganistas meos icibus scolopeti interfecerunt. Dereliquerunt me *optimi pueri mei* qui maxime valebant fervore et actione. Illi praecise erant qui intimiores mecum agebant. Ad manus litteras eorum habeo quas conservabo ut monumenta filiorum meorum in Christo ex quibus multa signa valoris elucent. Ex toto tempore quo praesum C., nulla effluxit hebdomas quin epistulam acciperem nunc ab

uno, nunc ab alio; omnes consilia a me rogabant de rerum statu me instruantes; et epistulae meae ad ipsos erant litterae edocentes, consilia afferentes et animum. Revera me non fefellerunt illi, et hodie magis illos amo quam unquam antea quia eorum video fidelitatem. Dedi ipsis exercitia spiritualia, admisi et recepi eos in C. et eorum confessarius eram.

Familiae eorum litteras ad me dederunt mihique miserunt eorum necrologia et imagines photographicas factas et dum viverent et post necem; gratias mihi agunt quod eos docuerim viam virtutis; meque aiunt gaudio affici debere eo quod habeam quatuor filios martyres."

Si alia notatu digna sunt de vita et morte horum aliorumque heroum sodalium, *PP. nostros provinciae mexicanae* ut nobiscum communicent enixe rogamus. Gloriae sunt hi adolescentes et iuvenes tum Societati tum Congregationi; arctior eorum martyrio evasit colligatio et relatio inter C. m. et Societatem Iesu. Morientes sodales mariani "*pro Christo Rege*," mundo ostendunt praeclaram educationem qua C. m. socios suos instruit et auget, nec vane ipsam iactare tesseram suam; "*Per Mariam ad Iesum*."

Favores intercessioni Ioachimi Silva adscripti

Mense Octobri de vita intima et virtutibus Ioachimi Silva et Carrasco, Sodalitis martyris Mexicani, scripsimus. Nunc pauca dicemus de favoribus qui intercessioni eius adscribuntur.

A metropoli mexicano scribitur: Sexaginta ferme iuvenes a gubernio occisos esse scimus; sed tamen Ioachimi ejusque socii Emmanuelis Melgarejo, nomen omnium ore vagatur.

Fama fert in Mexicana urbe quaedam ab ipsis accepta, miraculorum instar beneficia, referri. Ecce nonnulla quae certo evenisse scimus.

Matrona quaepiam, de valetudine desperata a medicis certior facta, (cancro tumore laborabat), auxilium a Ioachimo implorabit; a quo se subito sensit exauditam, quippe quae lethali illo morbo expedita fuit; quod ipsa amittae ejus Helenae narravit.

Vir alius qui pecuniarum rationem quandam in diem certum solvere debebat, cum par minime esset solvendo, Joachimum invocavit. Nec frustra: quo enim die ipse solvere debebat, incognitus vir quidam eum convenit, a quo quantum pecuniae necesse esset, accepit.

Erat etiam locatrix quaedam, cui duae domus locandae abhinc annum unum vacabant; tertiam vero conductor veterator occupaverat, solutionem omnino recusans. Illa tum afflicta ad Joachimum recurrit. Tribuvero diebus post, duae domus, quae vacuae fuerant, elocatae sunt; conductorque aliam reliquit, quam protinus alius, oblato pretio locationis, occupavit. Matrona tunc, ut martyri gratum animum ostenderet, ubi commorarentur eius parentes exquisivit; quo postea venit eos invisura, atque casum narravit.

Haec sunt pauca quae de duobus his juvenibus, Congregationis Marianae simul et Sodalitatis A. C. J. M. decore, habebamus nunc communicanda.

EXPOSITIO INTERNATIONALIS PRELI ET CULTURAE COLONIAE

Omnes **Directores** et **Secretarios CC.** necnon **Editores ephemeridum CC.** enixe rogamus ut (re cum P. Provinciali collata) omnibus opibus ac viribus unitis respondeant petitioni quae modo ad omnes CC. mar. dirigitur.

Mense maio 1928 in urbe Colonia (Germania) "**Expositio Internationalis Preli et Culturae**," initium sumet.

Spatium non angustum nobis attribuitur pro re sodalitatum.

Quae desiderantur a nobis haec sunt:

Documenta **historica et statistica** circa incrementum CC. in singulis terris, praesertim saeculis elapsis;

Documenta **artis**, i. e. pulchri **libri et libelli CC.** anteacti praeprimis temporis;

Vexilla sodalitatum praesertim antiqua, sed etiam nova, artistica tamen.

Pulchrae **imagines** divae Patronae CC.; item

Imagines photographicae vel **pictae** directorum sodaliumque clarissimorum, academiarum, theatrorum;

Programmata academiarum et theatrorum cum arte confecta, moderna et antiqua; et ut patet,

Spectacula ipsa impressa;

Ephemeridum nostrarum specimina, si fieri potest nitide compactum annum integrum 1927, et unum fasciculum ex 1928.

Diplomata cum arte confecta.

Editiones **cuiuscumque linguae** esse possunt.

Quae tantum **mutuantur, et postea reposcuntur, ut talia statim ab initio designantur.**

Quaecumque mittantur, **immediate Coloniam dirigantur**, vectionis pretio iam soluto, et quidem ad dominum laicum de CC. mar. optime meritum.

Inscriptio haec erit:

**Professor Dr. Kuckhoff,
Köln a. Rh. (Germania),
Sudermannstr. 1.**

Si forte quaedam **scribenda** veniant, utendum erit praeter linguam *germanicam, latinam, gallicam, anglicam*, quin unquam, ut patet, nominetur "**Acies Ordinata**."

Iterum ergo rogamus ut omnes conferant quam primum quantum poterunt et id etiam ut in ephemeridibus nostris aliis directoribus animus iniciatur ad concurrendum ad hoc opus quod cedit ad honorem B. M. V. et CC.

CC. IN AUSTRIA

Occasione canonizationis S. Petri Canisii a. 1925, die 22 maii Romae conventus directorum CC. linguae germanicae habebatur, cui inter alia proponebatur relatio de virorum iuvenumque CC. mar. in republica Austriae (1).

Ex dictis quae nunc demum publici iuris fiunt (Fahne Mariens, Wien 1927, p. 253) haec depromere liceat.

Erant tum temporis in Austria

CC. 21 sacerdotum cum 1678 sociis

6 alumnorum theolog. » 532 »

105 dominorum et virorum » 6892 »

2 ludimagistrorum . . . » 128 »

5 mercatorum » 614 »

5 operariorum » 415 »

13 stud. universitat. . . » 601 »

77 » schol. med. . . » 4050 »

96 » iuvenum et adol. » 3920 »

65 » puerorum . . . » 2816 »

Ergo 395 CC. cum 21.646 sodalibus.

LIBRI NOVI

Frey, "Der Gute Kongreganist", 16. et 17. ed. Paderborn. 1927, Junfermann; 199 pp.

Apertissimum libellum reddidit **P. Wolfinger**. Quae orationibus solitis praemittit et subiungit de historia, vita organisatione et praesertim de cultu B. V. in C., egregie dicta sunt.

Aug. Lamprecht, S. I. Heilige und Selige Sodalien. Wien 1927, Verlag der Fahne Mariens 75 p.

Gratissimum venit hoc opusculum multis pulchris imaginibus illustratum quo cl. auct. 36 sanctos beatosque congreganistas breviter ob oculos ponit sodalibus, quos hoc modo ad fervorem impellit.

Journées Mariales, St. Acheul 1926, Dijon-Brochon 1927, Enghien 1927, 40 p.

P. H. Baron, secr. CC. n. in prov. Camp. hoc libello pressam relationem publici juris — pro Nostris tantum facit eorum quae acta sunt a directoribus 4 prov. Gall. duobus congressibus. Aliis quoque provinciis multa utilia dicuntur.

Editor: **Albertus Boegle S. I.**

Superiorum permissu.

Romae - Ex Typographia Campitelli - Via Orazio Coclitte 50-A.

(1) Incolae Austriae circiter 6,500,000 numerantur, quorum non omnes sunt catholici.